

**Oqaasiliortut tallimangornermi aggustip ulluisa 24-anni**  
**2001, nal. 13.00 ataatsimiinnerannit imaqarniliaq**

Peqataasut: Carl Chr. Olsen, Alibak Steenholdt, Sofia Geisler, Kelly Berthelsen, allattaalluni Kristine Olsvig. Nuka Møller peqataasinnaannani nalunaarpoq.

Oqaluuserisat:

1. Oqaluuserisassat qulequtaannik akuersineq.
2. Aggustip ulluisa 27-ianni ataatsimiinnermit imaqarniliamut akuersineq.
3. Ilisimatitsissutit.
4. *Sinerissamut Aqutsivik.*
5. EF/EU-mut tunngasoq.
6. *Atortorissaarutilerisoq aamma namminersortunngorsaaneq.*
7. *Qulliarneq.*
8. Taasariaqartut allat.

- 1 pillugu -


SG-p oqaluuserisassat arfernat tunuartikkallaqullugu kissaatigaa, paasissutissat tamakkiisut pissarsiarereerunigit oqaluuserisassanut ilanngunneqaqqinnissaa kingusinnerusukkut nalunaarutigiumaaramiuk.

- 2 pillugu -

Imaqarniliaq akuerineqarpoq.

- 3 pillugu -

CCO.: Oqaasiliortut Dansk Sprognævnumut paasisassarsiorlutik taamatullu Nunat Avannaamioqatigiit oqaatsit pillugit Sverigemi ataatsimeersuarnissaannut peqataallutik angalanissaminnut pilersaarutaasimagaluartoq aappaagumut pisussanngorlugu kinguartinneqarpoq. Tamatumunnga patsisit annersaraat




anigaasat kontomit nikisinneqarsinnaasutut takorluukkat naatsorsuutigisamit ikileriarsimmata.

SG.: Oqaasileriffimmut anigaasaliissutit iluanni anigaasat Oqaasiliortunut atugassatut immikkoortinneqartartut aaqqissuussaasumik pilersaarusiugaallutillu aqunneqarsinnaasariaqarput aammalu Oqaasiliortunuinnaq atugassatut innimigisariaqarlutik.

AS.: SG-mut tapersiilluni ilassuteqarpoq Oqaasileriffimmut Oqaasiliortunullu anigaasaliissutit immikkoortilluinnarlugit aaqqissuunneqartariaqartut Oqaasileriffiup nalinginnaasumik ingerlanneqarneranut attuumassuteqanngitsunik.

CCO.: Siorna 2001-imut anigaasaqarnikkut pilersaarusiormi Oqaasiliortut angalanissaat eqqarsaataanngikkallarmat tassunga immikkoortitsisoqanngilaq. Tamanna isuma ukioq Kangerlussuarmi ataatsimeersuareernerup kingorna pinngorpoq periarfissiuunneqarlunilu. Taareerneqartutuulli anigaasartuutit allat peqquataallutik angalanissaq ukiormanna piviusunngorsinnaajunnaarpoq. Aappaagumut anigaasaliissutit immikkoortiterneqarnissaannut Oqaasiliortut angalanissaat immikkut anigaasaliiffiqineqassaaq Oqaasileriffiup immini anigaasatigut aqunneqarneranut attuumassuteqanngitsunik.

CCO.: Nordisk Sprogrådimi ilaasortat ataatsimiinneranni Nunat Avannaamioqatigiit iluminni agguataagassaattut ukiukkuutaartumik 800.000,00 koruunit anigaasaliissutaasartut qinnuteqaateqarsimasunut agguaanniarneqassapput. Oqaasileriffimmit 150.000,00 koruunit qinnuteqaatigineqarput, akuersissutigineqarnissaallu qularutissaasorinngilaa. Qinnutigineqartut qarasaasiakkut oqaatsinik katersinermut atugassatut siunniunneqareerput, maannamullu ordbogip "Oqaatsit" imaasa qarasaasiamut




nuutinnissaat sulissutigineqarpoq. Taakku saniatigut kukkuniiaatip qarasaasiamut ikkunneqarsinnaasup suliarineqarnissaa eqqarsaatinut ilaavoq.

KB.: Tamatumunnga tunngatillugu eqqumaffigisariaqarpoq pingaaruteqarluinnarlunilu erseqqissaavigissallugu, qarasaasiaq atorlugu suliat taakkartorneqartutut immikkoorutillit ataavartumik aningaasaliiffiuarmissaat, ingerlanneqarneri akisoqimmata, taamatullu nutarterneqartuartariaqarlutik. Taamaattumik pilersitsinerinnarmut aningaasaliissutit naammangillat.

CCO.: Oqaatsit pillugit politikissamut innersuussutit piffissarititaasoq eqqorlugu aasaaq tunniunneqarput. Innersuussutit ukiamut inatsisartunut saqqummiunneqassapput. Innersuussutit akuerineqassappata aningaasartuutaajumaartussat 600.000,00 naleqarnissaannut misingersorneqarnerat ilanngullugu tunniunneqarpoq. Aningaasat taakku Kangerlussuarmi ataatsimeersuarnermit innersuussutaasut pingaarnerit aningaasartassaraat. Innersuussutit naqitanngorlugu saqqummersinnissaat Atuakkiorfik peqatigalugu piareersimatinneqarpoq.

CCO.: Namminersorneq pillugu Isumalioqatigiissitaq novemberip qeqqata nalaani Nuummi ingerlanneqartumik ataatsimeersuartitsissaaq. Oqaasileriffimmit peqataasoqarnissaa naatsorsuutaavoq, pisariaqassappallu Oqaatsinut politikissamut innersuussutit saqqummiunneqarsinnaanerat eqqarsaataavoq.

KB.: Inuit Aqqinik Akuersisartut pillugit siamasinnerusumik najoqqutassaqarniarneq ajornartorsiutaasarpog. Ajoraluartumik inuit ilaasa atsiiniarnerminni itigartinneqartillutik Inuit Aqqinik Akuersisartut siulittaasuat peqqarniitsumik saassutarisarsimavaat. Inuit Aqqinik Akuersisartut ilaasortaasa aaqqiissutaasinnaasumik ujartuinissaminnut maanna pisariaqartitsinerat nukingernarsigaluttuinnartutut nalilersimavaat.



AS.: Inuit Aqqinik Akuersisartunut malittarisassaq qasukkartinneqartariaqarnersoq imaluunniit sukaterneqassanersoq misissorneqartariaqassaaq, massakkumut pissutsinut naleqquttunngorsarneqarsinnaanersoq aamma eqqartukkat ilagisinnaavaat.


CCO.: Inuit Aqqinik Akuersisartut, Oqaasiliortut Nalagaaffiullu Sinnisua peqatigiillutik Inuit Aqqinik Akuersisartut malittarisassaat pillugu ataatsimeeqatigiittariaqarput. Ataatsimiinnermi aamma eqqartorneqarsinnaasut ilagaat, aterusit, qallunaat aqqi kalaalerpaluttunngorsakkat, akilinermiut aqqi kiisalu atit kalaallisuujuorisat.

SG.: Akilinermiut naalagaaffimmi attuumassuteqarfigisaminni inatsisaasut malittussaavaat. Kalaallilli naalagaaffimmut allaalluinnartumut atasuupput, taakkulu malittarisassaat najoqqutarisussaavaat.

AS.: Nalagaaffimmut sumut atassuteqarneq apeqqutaatinneqanngilaq. Atsiiniarnermi tunngaviginiarneqartartut aamma ilagaat naggueqatigiinnermi atsiussisarnermi qangarsuaaniilli ileqqut. Tassunga tunngatillugu eqqartugassaqqissut ilagaat akilinermiullu atsiisarnitsinnut ileqquvut sumut killeqartissanerivut. KB.: Ajornartorsiutit annerit aamma ilagaat palasit namminneq inuttut isiginnittaasertik najoqqutaralugu sungiusimanngisaminnik kangusuutaasinnaasutut naliliillutik itigartitsisarnerat. Apeqqut pingaarnerpaaq tassani unaavoq, atip kangusuutaasinnaasup aammalu atip sungiusimanngisap naliliiffigineqarsinnaanerata killissaa sumiissanersoq.

CCO.: Atip inummut uppersaataalluni pingaaruteqarluinnarnera inuiaqatigiinnut paasisitsiniutigisariaqarpoq.

KB.: SG-ip siunnersuuteqarneratigut Inuit Aqqinik Akuersisartut oqallissaaralutik aggersaanissaat piareersarumavaa.



- 4 pillugu -

Oqaasiliortut oqaluuserisaq paasissutissanik annertunerusunik pissarsiniarfigeqqaarumavaat, paasinarsimmat napparsimaveqarfinnik aqutsineq arlalitsigut allanngortiterniarneqartoq, taamaattumillu periusissamut naleqquttumik taaguusiinissaq pingaaruteqarluni.


- 5 pillugu -

CCO.: EF/EU-lu pillugit qallunaat inatsisitigut atuinerat malillugu uagut kalaallit taaguutit atoratsigik Jacob Kornbeck tamatuminnga allakkatigut nalunaarfigineqassaaq.

- 7 pillugu -

CCO.: Taaguut *qulliarneq* suut tunngavigalugit taaguutit atulersimanersoq takussutissartaqanngimmat uppersarsaruminaappoq. Taamaattumik Oqaasiliortut saaffiginnissutit taamaattut aalajangiiffigeriikkat uppersassusermik apeqqusiinertallit illersorsinnaanissaat ujartuiffigisariaqarpoq. Oqaatsit taamaattut sumiorpalunermik ilaatigut tunngaveqarsinnaapput, soorlu avannaamiut allatut isumaqartikkaat, kujataamiulli allatut paasigaat. Taassumunnga aamma assersuutissaalluarpoq oqaaseq *qanilaarneq*. Ullumikkut inuusuttut qanilaarneq *nærhedimik* paasisarpaat

KB.: Qulliarnerup nappaatit ersiutigisartagai tunngavigalugit, taaguutaa naleqqulluinnartuuvoq. KB allaganngorlugu siunnersuusiussaaq, nappaatit ataasiakkaat pingasoqiusanngorlugit agguataarlugit nassuiaasersorlugillu. Immikkoortumi siullermi nappaatip taaguutaa pineqassaaq. Immikkoortup aappaani nappaatip ersiutigisartagai taakkartorneqassallutik, pingajuannilu nappaatip pissusaa eqqartorneqassalluni.



SG.: Oqaatsit Oqaasiliortunit aalajangiiffigineqartartussat oqaluuserisassanngorlugit saqqummiunneranni ataasiakkaarlugit piffimmi naliliiffigineqartarnissaat siunnersuutigaa.

Oqaatsimut qanilaarnermut tunngatillugu isumaqarpoq, kukkusumik atuisutut attuumassuteqartut ilisimatinneqareeraluarlutik, ilisimatitsissummut suusupaginninnerat Oqaasiliortunit qisuariarfigineqartariaqartoq.

Taamaaliortoqanngippat Oqaasiliortut tatiginassusaat aalajangigaannullu ataqqinassusaat suusupagineqartuassammat.

AS.: Oqaatsinik ataasiakkaanik sungiussineq tunngavigiinnarlugu atuilertarneq sianigisariaqarpoq. Taamaattumik pingaaruteqarluinnarpoq oqaatsinik ataasiakkaanik kukkusumik atuisut uparuartarnissaat.

CCO.: Oqaasiliortut paaseqatigiillutik oqaatsinut ataasiakkaanut uppernarsaruminaassinnaasunut avammut pissusissamik isumaliutersuuteqarnissaq siunnersuutigaa.

- 8 pillugu -

CCO.: Oqaasiliortut, kulturundervisningsudvalgi, Inuit Aqqinik Aalajangiisartut taamatullu Nalagaaffiup Sinniisuata ataatsimiinnissaat piareersarneqassaaq Inuit Aqqinik Aalajangiisartut malittarisassaata suleriaasiatalu nutaamik nalilersorneqarnissaat pingaarnertut oqaluuserineqassalluni.

Oqaasiliortut tulliani ataatsimiissapput, tallimanngorneq septembarip ulluisa 28-anni 2001, nal. 13.00.

Carl Chr. Olsen  
Siulittaasoq

Kristine Olsvig  
Allatsi